

URDHËR I PËRBASHKËT

Nr. 587, datë 2.12.2024

PËR DISA SHTESA DHE NDRYSHIME NË URDHRIN E PËRBASHKËT NR. 661, DATË 1.12.2023, "PËR MIRATIMIN E RREGULLORES PËR ZHVILLIMIN E MATURËS SHTETËRORE NË REPUBLIKËN E SHQIPËRISË"

Në mbështetje të nenit 102 të Kushtetutës së Republikës së Shqipërisë, të ligjit nr. 69, datë 21.6.2012, "Për sistemin arsimor parauniversitar në Republikën e Shqipërisë", të ndryshuar dhe të ligjit nr. 15/2017, datë 16.2.2017, "Për arsimin dhe formimin profesional në Republikën e Shqipërisë",

URDHËROJMË:

I. Në rregulloren "Për zhvillimin e Maturës Shtetërore në Republikën e Shqipërisë", bashkëlidhur dhe pjesë përbërëse e urdhrit të përbashkët nr. 661, datë 1.12.2023, "Për miratimin e rregullores për zhvillimin e Maturës Shtetërore në Republikën e Shqipërisë", të bëhen shtesat dhe ndryshimet si më poshtë:

1. Në nenin 2, pas pikës 1 dhe pikës 14 të shtohen përkatësisht pikat 1/1 dhe 14/1 me përmbajtje si më poshtë:

"1/1. Ministria përgjegjëse për AFP (ministria përgjegjëse për arsimin dhe formimin profesional).

...

14/1. QBNND (Qendra Burimore e Nxënësve që Nuk Dëgjojnë)".

2. Kudo në rregullore fjalët "Drejtoria e Përgjithshme e Arsimit Parauniversitar" dhe akronimi "DPAP" të zëvendësohen me fjalët "Agjencia Kombëtare e Arsimit Parauniversitar" dhe "AKAP".

3. Pika 13, e nenit 6 të riformulohet si vijon:

"13. Informon çdo ZVAP për rezultatet e provimeve të maturës së maturantëve/kandidatëve të shkollave përkatëse, si dhe institucionet e arsimit profesional".

4. Në pikat 4 dhe 5, të nenit 7 fjalët "... dhe në DRAP ..." zëvendësohen me fjalët "... në DRAP dhe në institucionet e arsimit profesional ...".

5. Shkronja "e" e nenit 8 ndryshon, si më poshtë:

"e) monitoron të gjithë procesin e plotësimit të formularëve A1/A1Z, të cilët shkarkohen nga sistemi dhe nënshkruhen nga drejtori i shkollës, mbikëqyrësi i formularëve dhe mësuesi kujdestar përkatës. Listën e maturantëve që kanë plotësuar këta formularë (në dy kopje) ia përcjell zyrtarisht ZVAP-it."

6. Në nenin 9 të bëhen ndryshimet dhe shtesat si më poshtë:

a) Titulli i nenit ndryshon si më poshtë:

"Detyrat e ministrisë përgjegjëse për AFP-në, ASCAP-it, AKAFPK-së, AKAP-it dhe DRAP-it".

b) Pas pikës 1 shtohet pika 1/1 me përmbajtje, si më poshtë:

1/1. Ministria përgjegjëse për AFP-në ka për detyrë të përgatisë listën e të gjitha shkollave të mesme të arsimit profesional dhe ta dërgojë në AKAP.

c) Në fund të pikës 2 shtohet fjalja si më poshtë:

AKAFPK-ja përditëson listën e provimeve të detyruara të teorisë profesionale të integruar, sipas kualifikimit profesional që maturantët/kandidatët kanë ndjekur në shkollat profesionale.

d) Pas shkronjës "b" të pikës 3, të nenit 9 shtohet shkronja "c", me përmbajtje si më poshtë:

"c) Të dërgojë zyrtarisht në QSHA brenda muajit nëntor dhe elektronikisht listën dhe emërtimet zyrtare të shkollave të arsimit të mesëm të lartë, për Maturën Shtetërore dhe Maturën Shtetërore Profesionale."

7. Në nenin 27 të shtohet pika 6/1 me përmbajtje si vijon:

"6/1. AKAP-i dërgon listën përfundimtare të maturantëve/kandidatëve që do t'i nënshtrohen rivlerësimit, në format elektronik në QSHA brenda datës 5 korrik".

8. Pas nenit 31 të shtohet neni 31/1 me përmbajtje si vijon:

Provimet e Maturës Shtetërore për nxënësit e Qendrës Burimore të Nxënësve që Nuk Dëgjojnë

1. Maturanti/kandidati, i cili ka përfunduar me sukses vitin e fundit të shkollës së mesme të orientuar në QBNND dhe ka plotësuar formularin A1 dhe A1Z u nënshtrohet provimeve të Maturës Shtetërore.

2. Testet e provimeve të Maturës Shtetërore hartohen nga QSHA-ja në bashkëpunim me QBNND-në, bazuar në programet orientuese mësimore dhe fondin e pyetjeve të lëndëve përkatëse.

3. Provimet e Maturës Shtetërore për këta maturantë zhvillohen në mjediset e QBNND-së, sipas kriterëve të përcaktuara në këtë rregullore, ku të jenë të pranishëm edhe mësues të gjuhës së shenjave.

4. Testi përmban të tria nivelet e arritjeve.

5. Vlerësimi i testeve bëhet në bashkëpunim me mësuesit e QBNND-së.”

II. Ngarkohen për zbatimin e këtij urdhri, sekretarët e përgjithshëm në Ministrinë e Arsimit dhe Sportit dhe Ministrinë e Ekonomisë, Kulturës dhe Inovacionit, Drejtorja e Përgjithshme e Zhvillimit për Arsimin Parauniversitar, Qendra e Shërbimeve Arsimore, Agjencia e Sigurimit të Cilësisë së Arsimit Parauniversitar, Agjencia Kombëtare e Arsimit Parauniversitar, Drejtoritë Rajonale të Arsimit Parauniversitar, zyrat vendore të arsimit parauniversitar, Agjencia Kombëtare për Punësim dhe Aftësi, Agjencia Kombëtare e Arsimit, Formimit Profesional dhe Kualifikimeve dhe Institucionet Arsimore Parauniversitare.

Ky urdhër hyn në fuqi menjëherë dhe botohet në Fletoren Zyrtare.

MINISTËR I ARSIMIT DHE SPORTIT

Ogerta Manastirliu

MINISTËR I EKONOMISË, KULTURËS DHE INOVACIONIT

Blendi Gonxhja